

## REGIONAL NEWS

HEADLINES:

1. Larsap General (Retd) Vijay Kumar Singh-a'n Mizo thalaiten Indian Armed Forces zawm turin theihna leh chakna an ngah tih sawiin Mizo sipai hmingthate hnungzui ve turin a chah.
2. Tunhnaia Indigo thlawhtheihna engemawzat khaihlahk avanga khualzin tam takin harsatna an tawh tihziaawm nan Northeast Frontier Railway chuan Sairang leh Guwahati inkara tlan rel-ah coach pahnih a dah belh a, tunkar ningani atangin special train 2 a tlan tir dawn bawk.
3. Mizoram sorkar, kohhran leh tlawmngai pawlte'n ruihhlo do beihpui an thlak mek karah kumin hian kum 21 hnua ruihhlo vanga thi an tam ber tum a thleng.
- 4 Goa-a nizana lamna hmun pakhata kangmei chhuakah mi 25 an thi.

&lt;&gt;&lt;&gt;&lt;&gt;

ARMED FORCES FLAG DAY

Larsap General (Retd) Vijay Kumar Singh-a'n Mizo thalaite chu Indian Armed Forces zawm tura theihna leh chakna an ngah zia hria a, Mizoram atanga Indian Armed Forces mi leh sa hmingthate hnungzui ve turin a chah.

Armed Forces Flag Day, 2025 puala thuchah a sawiah, Larsap chuan December ni 7 chu ram chhan nana nunna hlu tak hlantute, ram inpumkhatna vawngnim tura ramri depa huaisen taka beitate leh la bei chhonzawm zel tur sipaite zahna lantirna ni a nih angin, Mizorama Ex-Servicemen zawng zawngte chibai bukin ram tana an hnathawh avangin lawmthu a sawi a. Larsap chuan Indian Armed Force-te chu ram leilung, tuipui leh van boruakte ngawrh taka venghimitute an ni tih sawiin, an thawhrimna zarah mipuite ralmuang takin an awm theiani ati a, Indian Armed Force mi leh sa Mizoramin a chherchhuah tha tak tak, State leh India tihmingthatute zingah Lt (Retired) Col Clement Lalhmingthanga leh Petty Officer TBC Lalvenchhunga te chu Mizoram Legislative Assembly of 9 naah member ni lai mek an ni tih sawiin, Mizoram fa hrin Captain Lalrinawma Sailo, 4th Para (Special Forces) chuan kumin August ni 15 khan sipai huaisen chawimawina Kirti Chakra a dawng chu chhuanawm a tih thu a sawi a, Mizoram thalaite chu Mizo mi chhuanawm leh hmingtha tak takte entawna infuih thar nan hmang tur leh, Indian Armed Forces zawm tura theihna leh chakna an ngah zia hre thar turin a chah a ni.

Larsap chuan Sawrkar kum kalta leh kal mekah Mizoram sawrkarin indona avanga boral leh hliampui tuar chhungte hnenah Cheng nuai sawm leh panga a sem chhuak tawh tih sawiin, Ex-Servicemen leh an chhungkua, an vaiin 23 - damlohna avanga inenkawl ngai 16 leh khuarel chhiatna tawk 7 - te hnenah tanpuina Cheng singkua sangkhat leh zanga sem ral a nih thu a sawi bawk.

&lt;&gt;&lt;&gt;&lt;&gt;

## LADC COUNTING

Lai Autonomous District Council (LADC) hnuai Member of District Council inthlan neih zawh taka vote tla te chhiar turin inbuatsaihna kalpui mek a ni a, vote hi naktip, thawhlehi ah chhiar a ni ang.

Vawiin khan Lawngtlai DC Conference Hall-ah vote chhiar tur te an training a, he hunah hian District Election Officer Pu Donny Lalruatsanga chuan harsatna awm lova vote thlak zawh fel ani chu lawmawm atih thu sawiin inthlanna felfai a awm theih nana pui tu MPF leh tlawmngai pawl te thawhrimna chu chhuanawm atih thu a sawi a ni.

DEO chuan Lungtian -II, a Polling Officer-boral ta Pu Israel MS Dawngliana chungchang sawiin sawrkar atanga ralna a dawn theih nan theihtawp chhuah ani a ti a, vote chhiarah fimkhur a tul hle tih pawh sawiin buaina awm lo turin Counting Official te chu tha taka inzir turin a chah a ni.

LADC inthlanah hian vote za zela 83.99% tla in vote tla te hi naktip, thawhlehi ah Govt. Lawngtlai College- ah zing dar 8 atangin chhiar a ni ang.

<><><>

## SPECIAL TRAIN

Tunhnaia Indigo thlawhtheihna engemawzat khaihlak avanga khualzin tam takin harsatna an tawh tihziaawm nan Northeast Frontier Railway NFR chuan Sairang leh Guwahati inkara tlan rel-ah coach pahnih a dah belh a, tunkar ningani atangin special train 2 a tlan tir bawk.

Northeast Frontier Railway chuan tunhnaia khualzin phur thlawhtheihna thlawk tur tam tak khaihlak avanga khualzin tangkhang an pun avangin nimin December ni 6 atang khan Guwahati-Sairang Express-ah coach pahnih AC leh Sleeper a dah belh a, vawiin atangin Sairang - Guwahati Express ah coach pahnih AC leh Sleeper dah belh lehin heng coach an dah belh te hi dah belh hlen tur nilovin khualzinte tana a remchan zawkna tura dah lailawk a nih thu an sawi bawk.

Hei bakah hian AC 3 Tier coach pahnih, Sleeper class coach 10 leh GSLR coach 2, a vaiin coach 14 awmna Special train chu tun thla December ni 11, Ningani khian Nagaland khawpui pakhat Dimapur atanga Sairang thleng tlan tir a ni dawn a, December ni 12, Zirtawpni khian Sairang atanga Guwahati thleng tlan tir a ni bawk ang.

NFR thuneitute chuan he an ruahmanna siam hian khualzinte an ngaihpawimawh zia a lantir bakah Thlasik laiin hmarchhak state hrang hrang Mizoram, Assam, Meghalaya, leh Nagaland-ah te khualzin an pun chhoh avangin coach leh special train dah belh hian tualchung mite leh a tlawhtute tan hlawkna a thlen ngei an beisei thu an sawi a ni.

<><><>

## MAMIT DISTRICT CHRISTMAS PREPARATION

Mamit District ah Krismas leh kumthar lawm turin mipuite chu an inbuatsaih cho mek a, Kohhran thenkhat chu nimin khan Krismas inbuatsaihna atan thingphurin an hnatlang ani.

Mamit District ah hian Krismas ruaithehna tur leh lengkhawm thingpui lum nan tunhma atangin Nu leh pa, nula leh tlangval leh naupang ten a huhovin ramhnuai ah Krismas thing an phur thin a, nimin khan Mamit district chung a Kohhran thenkhat chuan christmas pual hian hnatlangin thing an phur a, Kohhran dangte pawhin neih chhoh zel an tum bawk.

*Hun inherdanglam zelah Khawpui lamah eirawngbawl nan gas an hman nasat tawh vangin krisman thingphurh hi an nei ngai tawhlo a, thingtlang lamah chuan eirawngbawl na gas a harsat avang leh thingtuah tur ala tam avangin Krismas thingpui leh ruai siam nan hian thing anla hmang thin a, Hmanlai hunah chuan Krismas thingphurh hi nula leh tlangval ten an nghahhleh ber pakhat a ni thin a ni.*

<><><>

#### AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

#### END

Mizoram sorkar, kohhran leh tlawmngai pawlte'n ruihhlo do beihpui an thlak mek karah kumin hian kum 21 hnua ruihhlo vanga thi an tam bertum a thleng.

Excise & Narcotics Department in a chhinchhiah danin, kumin January thla atanga tun thla December ni 2 thleng khan Mizoramah ruihhlo vangin mipa 69 leh hmeichhia 14, an vaiin mi 83 an thi tawh a, kum 21 chhunga ruihhlo vanga thi an tam bertum niin, ruihhlo vanga thi te hi thalai kum 17 atanga kum 57 inkar te an ni a, an zinga mi 33 te chu Heroin vanga thi an ni a, midang 47 te chu heroin leh ruihhlo dang tihpawlh vanga thi an ni thung a, midang pathum chu alprazolam, damdawi mum leh damdawi dang vanga thi an ni.

Excise & Narcotics Department in Mizorama ruihhlo vanga thi a chhinchhiah tan kum 1984 atanga kumin thlengin Mizoramah ruihhlo vangin mi 1962 an thi tawh a, heng zinga mi 1722 chu mipa niin, 240 te chu hmeichhia an ni a, ruihhlo vanga thi tawh zingah kum 14 mi chu a naupang ber a, kum 58 mi a upa bertung a ni.

Kum 2004 kha Mizorama ruihhlo vanga thi an tam bertum niin mi 143, mipa 122 leh hmeichhia 21 an thi a, khatih hunlai khan Proxyvon chu an thihpui tam bertum a ni a, kum 2015 chho atangin ruihhlo vanga thi zingah Heroin vanga thi an tam tan a. Kum 2004 hnulamah kumin 2025 hi ruihhlo vanga thi an tam bertum a ni a, Excise & Narcotics Department in Ruihhlo vanga thi a chhinchhiah zingah hian zu vanga thi an tel lo a ni.

<><><>

#### GOA NIGHTCLUB FIRE

Goa-a nizana lamna hmun pakhat kangmei chhuakah mi 25 an thi a, midang engemawzatin hliam an tuar bawk. Vanduaina hi North Goa-a Arpora-a thleng a ni a, State Chief Minister, Pramod Sawant-a chu vanduaina thlenna hmunah hian kal nghalin kangmei chhuah chhan dik tak hriat anih theih nan magisterial inquiry din nghal a ni ang, a ti a, thi zinga a tam bertum chu club choka-a thawkte an nih thu leh tourist 4 vel pawh an tel thu a sawi a, thi chhungte hnenah tawrhpuina a hlan bawk.

Prime Minister Narendra Modi-a pawhin Goa-a thil thleng chu pawh a tih thu sawiin thi chhungte hnenah tawrhpuina a hlan a, PM National Relief Fund atangin thi chhungte hnenah zangnadawmna, cheng nuai 2 theuh leh hliam tuarte, cheng sing 5 theuh pek an nih tur thu a sawi a ni.

<><><>

### SOUTH AFRICA SHOOTING

South Africa khawpui pakhat, Pretoria-a nimina silai keng-ten Bar pakhat chhunga awmte an pawng kahnaah mi 11 an thi a, midang 14-in hliam an tuar baw. Thi zingah hian naupangte pawh an tel a ni.

Police sawi danin, silai keng mi 3-in bar hi luh chilhin a hmuna awmte chu an pawng kah vak a, a hmunah mi 10 thi nghalin damdawi inah mi 2 an thi baw. Pawi khawihn thlen chhan hi hriat a la ni lova, police-ten ngawrh takin an chhui zui mek a ni.

South Africa-ah hian silaia pawi khawihna a thleng zing hle a, nikum 2024-ah khan mi 26,000 chuang kah hlum an ni a, chawh rualin nitin mi 70 chuang thi ziah ang an ni.

<><><>

### WORLD CUP 2026 SCHEDULE RELEASED

International Federation of Association Football (FIFA) chuan United States, Canada leh Mexico-ten an inthlen tawm tur, kum 2026 World Cup Football khelh dan tur a tichhuak a, game 104 khelh turah a tan ni, June ni 11-ah Mexico leh South Africa-te, Mexico City-ah an intum ang a, June ni 18-ah champion lai, Argentina leh Algeria-te an inkhel ang a, final i hi July ni 19-ah New Jersey-a Metlife Stadium-a khelh tura ruahman a ni.

United States-ah match 78 khelh a ni ang a, Canada leh Mexico-ah match 13 ve ve khelh a ni ang. South Korea, Canada leh Mexico-te chu vawi khatmah US-ah an khel dawn lo a ni.

<><><>